

PERANAN AS-SUHBAN AS-SOLEHAH MENURUT HADITH NABI SAW DALAM MEMBENTUK MASYARAKAT SEJAHTERA

THE ROLE OF RIGHTEOUS COMPANIONSHIP ACCORDING TO THE PROPHETIC HADITH IN SHAPING A HEALTHY AND WELL-BEING SOCIETY

Ahmad Arif Aiman bin Osman¹
Prof Madya. Dr. Mohd Yusuf Ismail²
Dr. Amiruddin Mohd Sobali³

¹Fakulti Pengajian Al-Quran Dan Sunnah, Universiti Sains Islam Malaysia (USIM), Malaysia
(E-mail : ahmadarifaiman08@gmail.com)

²Fakulti Pengajian Al-Quran Dan Sunnah, Universiti Sains Islam Malaysia (USIM), Malaysia
(E-mail : yusufismail@usim.edu.my)

³Fakulti Pengajian Al-Quran Dan Sunnah, Universiti Sains Islam Malaysia (USIM), Malaysia
(E-mail : amiruddin@usim.edu.my)

Article history

Received date : 7-10-2025

Revised date : 8-10-2025

Accepted date : 24-11-2025

Published date : 30-12-2025

To cite this document:

Osman, A. A. A., Ismail, M. Y., & Sobali, A. M.
(2025). Peranan as-suhbah as-solehah menurut hadith
Nabi SAW dalam membentuk masyarakat sejahtera.
*Journal of Islamic, Social, Economics and
Development (JISED)*, 502 – 515.

Abstrak: Artikel ini meneliti peranan al-suhbah al-solehah menurut hadis Nabi Muhammad SAW dalam membentuk masyarakat sejahtera. Kajian ini dibuat bagi menjawab isu peningkatan masalah sosial dan isu kesihatan mental dalam masyarakat moden serta menonjolkan relevansi panduan Nabawi tentang kepentingan memilih lingkungan sahabat yang soleh. Perbincangan difokuskan kepada analisis hadis-hadis yang berkaitan dengan al-suhbah al-solehah, penjelasan ulama dalam kitab-kitab syarah hadis, serta implikasinya terhadap pembinaan masyarakat yang sejahtera dan berakhlak mulia. Kajian ini menggunakan pendekatan kualitatif melalui kaedah kepustakaan. Analisis dilakukan terhadap teks hadis terpilih, pentafsiran ulama dalam kitab syarah hadis, serta perbincangan kontemporari berkaitan hubungan sosial dalam Islam. Dapatan kajian menunjukkan bahawa al-suhbah al-solehah mempunyai tiga peranan utama. Pertama, ia berfungsi sebagai mekanisme pencegahan daripada pengaruh negatif yang boleh membawa kepada keruntuhan akhlak dan masalah mental. Kedua, ia menjadi agen pengukuhan iman melalui dorongan untuk melaksanakan ketaatan dan menjauhi maksiat. Ketiga, ia membentuk jaringan sosial positif berasaskan ukhuwah, kasih sayang, dan tolong menolong. Peranan ini membuktikan bahawa persahabatan dengan orang soleh memberi kesan bukan sahaja kepada individu, malah turut menyumbang kepada kesejahteraan masyarakat. Kesimpulannya, hadis-hadis Nabi SAW menegaskan bahawa pemilihan sahabat yang soleh merupakan aspek penting dalam usaha membentuk masyarakat yang sejahtera dan harmoni. Kajian ini akan memberi sumbangan dari sudut akademik dengan menegaskan bahawa usaha menangani masalah sosial dan Kesihatan mental tidak terbatas sekadar hanya bergantung kepada perundangan atau hukuman semata-mata dan

ubat-batan klinikal sahaja, tetapi perlu diberikan perhatian kepada pembentukan persekitaran sosial yang baik melalui jaringan persahabatan yang soleh dan perdampingan bersama ulama yang ikhlas sebagaimana yang digariskan oleh Rasulullah SAW.

Kata kunci: *al-Suhbah al-Solehah, Masyarakat Sejahtera, Sahabat Soleh, Akhlak, Kesihatan Mental*

Abstract: *This article explores the role of al-ṣuḥbah al-ṣāliḥah (righteous companionship) according to the hadiths of the Prophet Muhammad SAW in shaping a virtuous and prosperous society. The study is motivated by the increasing prevalence of social problems and mental health issues in modern communities, which highlights the need to revisit Prophetic guidance on the importance of cultivating a positive social environment and choosing righteous companions. The discussion centres on hadiths that address the influence of companionship, supported by explanations from classical hadith commentaries and contemporary scholarly insights related to social relations in Islam. Using a qualitative, library-based research approach, this study analyses selected hadith texts alongside authoritative interpretations from traditional scholars. The findings indicate that al-ṣuḥbah al-ṣāliḥah plays three primary roles. First, it acts as a protective factor against negative influences that can lead to moral decline and psychological distress. Second, it strengthens faith by encouraging obedience, spiritual growth, and moral discipline. Third, it fosters a positive social network rooted in brotherhood, compassion, and mutual support, thereby contributing to community well-being. Overall, the study concludes that righteous companionship is a key element in building a harmonious and healthy society. It further emphasises that addressing social and mental health issues requires more than legislation or clinical treatment; it also demands the cultivation of a supportive social environment shaped by virtuous friendships and close association with sincere scholars, as emphasised in the Prophetic tradition.*

Keywords: *as-Ṣuḥbah as-Ṣāliḥah, Prosperous Society, Righteous Companions, Morality, Mental Health*

Pengenalan

Konsep kesejahteraan masyarakat merupakan salah satu matlamat utama dalam pembangunan tamadun manusia. Dalam kerangka Islam, menurut artikel yang ditulis oleh Shamsiah, Asmak dan Sharifah (2010) menegaskan bahawa kesejahteraan Islam tidak hanya ditakrifkan sebagai keseimbangan material dan fizikal semata-mata, bahkan turut merangkumi aspek kerohanian, akhlak, dan hubungan sosial yang harmoni. Setiap individu secara fitrahnya mendambakan kehidupan bermasyarakat yang sejahtera dan bahagia. Namun, realiti semasa memperlihatkan bahawa masyarakat moden berhadapan dengan pelbagai cabaran serius, antaranya peningkatan kadar jenayah, keruntuhan institusi kekeluargaan, krisis identiti, serta kerosakan akhlak yang menghakis nilai kemanusiaan. Keadaan ini menuntut penelitian terhadap pendekatan Islam yang bersifat menyeluruh dan holistik dalam menangani permasalahan sosial kontemporari. Antara pendekatan penting yang diketengahkan oleh Nabi Muhammad SAW dalam hadis-hadis baginda ialah konsep *as-suhbah as-solehah*, iaitu persahabatan atau perdampingan dengan individu yang berilmu, soleh dan berakhlak mulia. Prinsip ini menegaskan bahawa hubungan sosial dalam Islam bukan sekadar interaksi biasa, tetapi merupakan mekanisme pembentukan peribadi, pengukuhan iman, dan pengawalan tingkah laku (Utomo & Pahlevi, 2022). Hal ini jelas digambarkan dalam hadis riwayat al-Bukhari bahawa Rasulullah SAW bersabda:

مَثَلُ الْجَلِيسِ الصَّالِحِ وَالسَّوِّءِ، كَحَامِلِ الْمِسْكِ وَنَافِخِ الْكَيْسِ، فَحَامِلِ الْمِسْكِ: إِمَّا أَنْ يُحْذِيكَ، وَإِمَّا أَنْ تَبْتَاعَ مِنْهُ، وَإِمَّا أَنْ تَجِدَ مِنْهُ رِيحًا طَيِّبَةً، وَنَافِخِ الْكَيْسِ: إِمَّا أَنْ يُخْرِقَ ثِيَابَكَ، وَإِمَّا أَنْ تَجِدَ رِيحًا خَبِيثَةً

Maksudnya: “Perumpamaan teman yang baik dan teman yang buruk adalah seperti seorang penjual minyak wangi dan seorang tukang besi. Adapun, penjual minyak wangi akan memberi kamu (minyak wangi tersebut), atau kamu membeli daripadanya, atau kamu mendapat bau yang harum daripadanya. Sedangkan tukang besi pula, akan membakar bajumu dan juga kamu mendapatkan bau yang busuk.” [Riwayat al-Bukhari]

Maka, Islam sangat mementingkan nilai persahabatan kerana ia mampu memberi pengaruh yang besar dalam kehidupan bermasyarakat. Hadith yang masyhur ini juga memberikan asas penting bahawa kesejahteraan masyarakat amat berkait rapat dengan kualiti hubungan sosial yang dibina. Teman yang soleh diibaratkan sebagai agen kebaikan yang mampu memperkukuh iman, menyuburkan akhlak, serta menyebarkan nilai positif yang akhirnya melahirkan suasana masyarakat yang harmoni dan sejahtera. Sebaliknya, persahabatan dengan individu yang rosak akhlaknya bukan sahaja mengundang kemudaratan kepada diri, bahkan turut menyumbang kepada keruntuhan nilai kemasyarakatan secara lebih luas. Hal ini dijelaskan dalam Surah Az-Zukhruf, ayat 67:

﴿الْأَخِلَاءُ يَوْمَئِذٍ بَعْضُهُمْ لِبَعْضٍ عَدُوٌّ إِلَّا الْمُتَّقِينَ﴾

Maksudnya: Teman-teman akrab pada hari itu sebahagiannya menjadi musuh bagi sebahagian yang lain kecuali orang-orang yang bertakwa. (Surah Az-Zukhruf: 67)

Imam Tabari (7780H) di dalam kitabnya menyatakan bahawa setiap persahabatan di dunia ini akan bertukar menjadi permusuhan di akhirat kelak kecuali persahabatan yang dibina di atas ketaqwaan. Hal ini dikuatkan dengan *athar* daripada Sayyidina Ali bahawa dua orang teman yang beriman saling puji memuji kerana mereka ketika di dunia dahulu saling mengajak kepada kebaikan dan mencegah dari melakukan keburukan. Manakala, dua orang teman yang kafir pula apabila mereka sudah mati maka mereka akan saling cela mencela dengan ungkapan inilah seburuk-buruk teman kerana telah menyuruh berbuat jahat dan menghalang melakukan kebaikan. Syeikh Wahbah Zuhaili juga menafsirkan ayat ini bahawa setiap persahabatan yang dibina dengan ketaqwaan dan kerana Allah SWT akan mendapat kesejahteraan di dunia sehingga hari akhirat nanti. Namun, sebaliknya ia akan bertukar menjadi permusuhan di akhirat kelak apabila persahabatan itu dibina bukan di atas keredaan Allah SWT. Oleh itu, setiap muslim hendaklah mengambil pengajaran daripada ayat di atas supaya mereka saling berdamping dengan orang-orang yang soleh, teman yang berakhlak mulia, bersahabat kerana Allah, perbanyakkan teman yang baik, mendekati para alim ulama dan melazimi majlis-majlis ilmu.

Sehubungan itu, pemilihan lingkungan sosial yang baik menjadi strategi pencegahan sosial yang efektif dalam Islam. Isu-isu keruntuhan akhlak dan moral masyarakat kini semakin membimbangkan. Contohnya kes seorang abang ipar mati dibunuh oleh adik iparnya sendiri sehingga putus kepala (Utusan Malaysia, 2025). Permasalahan kesihatan mental di Malaysia turut dikaitkan dengan tingkah laku bunuh diri (Kementerian Kesihatan Malaysia, 2022). Oleh itu, berdasarkan keadaan semasa masyarakat yang dilanda pelbagai isu dan keruntuhan akhlak ini maka rawatan dan pencegahan mestilah segera digerakkan di setiap kawasan penempatan.

Walaupun perbincangan tentang kesejahteraan masyarakat sering diketengahkan, namun aspek *as-suhbah as-solehah* menurut perspektif hadis Nabi SAW masih kurang diberikan perhatian secara mendalam. Maka artikel ini bertujuan meneliti peranan al-suhbah al-solehah berdasarkan hadis-hadis Nabi SAW, huraian para ulama dalam kitab-kitab syarah hadis, serta relevansinya dalam menghadapi cabaran sosial semasa dan isu-isu mental seperti kebimbangan, buhuh diri, kemurungan dan lain-lain. Kajian ini diharapkan dapat memberikan sumbangan ilmiah dalam memperkayakan wacana akademik berhubung strategi pembangunan masyarakat Islam yang harmoni, sejahtera, dan berdaya tahan berasaskan panduan Nabawi.

Kajian Literatur

Terdapat 4 perkara yang akan dibincangkan dalam Kajian Literatur iaitu:

Konsep al-suhbah al-solehah

Konsep *al-suhbah al-solehah* merupakan gabungan dua perkataan yang berasal daripada kalimah bahasa arab yang bermaksud persahabatan yang baik. Menurut Ibn Manzur (1414H) di dalam kitab Lisan al- 'Arab bahawa *al-suhbah* berasal dari perkataan *sahiba* yang merujuk kepada kebersamaan, kesepakatan dan kerasian dalam hubungan dua hala antara dua orang dan lebih. Selain itu, Ibnu 'Asyur (1984H) menakrifkan bahawa *suhbah* itu adalah kebersamaan dalam perkara berkumpul dan bersendirian sebagai penghibur dan persetujuan. Contohnya, keadaan suami isteri itu dipanggil sahabat, keadaan permusafiran dengan orang lain dipanggil sahabat. Konsep ini boleh digunakan dalam pelbagai situasi termasuk dalam konteks yang tidak baik. Mudah kata, *al-suhbah al-solehah* ialah konsep yang bermaksud, teman rapat untuk melakukan banyak perkara secara bersama.

Ibnul Jauzi (2003) berkata "*Suhbah*" bermaksud persahabatan yang boleh digunakan dalam istilah umum yang membawa maksud bergaul, bercampur, dan berkawan yang tidak meninggalkan orang yang didampingi tersebut. Maka dapat disimpulkan bahawa istilah suhbah bermaksud sahabat rapat yang sentiasa berdamping atau seseorang yang selalu bersama atau setia dengan kita ketika senang dan susah. Sahabat ini pula tidak terhad kepada mereka yang sebaya tetapi merangkumi semua yang sentiasa berdamping dengan seseorang termasuk rakan, guru, jiran perumahan dan seumpamanya. Dalam penulisan ini, ia akan memberi fokus kepada suhbah dalam erti kata lingkungan yang baik khususnya teman dan guru berpandukan panduan Hadis Nabi SAW.

Etika Persahabatan

Kajian oleh Azmin Yusoff & Muhammad Ismail (2017) menunjukkan bahawa al-Quran dan hadis Nabi SAW memberikan panduan dan petunjuk mengenai etika atau adab persahabatan dalam Islam iaitu persahabatan mestilah ikhlas semata-mata kerana Allah S.W.T, saling tolong menolong antara sahabat, menziarahi ketika sakit, tidak mencela dan mengata sahabat, mendoakan sahabat, tidak membebankan sahabat, mengutamakan keperluan sahabat dan memperbaiki kekurangan sahabat.

Dapatan kajian oleh Dedeh Juliati Kurnianingsih (2022) mendapati saling menghormati dan menghargai satu sama lain adalah perkara utama dalam persahabatan menurut Ibn Miskawayh. Beliau menekankan bahawa prinsip ini perlu diterapkan dalam etika persahabatan supaya mencegah perpecahan sesama manusia dan akhirnya masyarakat hidup dalam keadaan sejahtera, harmoni dan bertamadun.

Peranan Mendampingi Orang Soleh (*As-Suhbah Al-Solehah*)

Peranan berdamping dengan orang soleh telah dibincangkan secara meluas. Sebagai contoh, kajian oleh Muzammil Noor & Aroosa Latif (2024) menekankan bahawa tokoh soleh memainkan peranan penting dalam membentuk kekuatan dalam sesebuah masyarakat. Kehidupan dan akhlak mereka menjadi teladan moral yang mendorong masyarakat mencontohi nilai-nilai kebaikan. Selain itu, golongan soleh turut berperanan dalam menyemai kasih sayang dan keadilan melalui pendekatan Rahmah serta sikap menghormati sesama manusia.

Kajian yang berjudul *Significance and Challenges of Special Companionship (As-Suhbatul-Khasah)* yang ditulis oleh Dr. Abdullahi & Dr. Adam (2022) menerangkan bahawa as-suhbah atau persahabatan khas menjadi salah satu pendekatan penting dalam tradisi Islam. Artikel ini menekankan bahawa hubungan rapat antara guru dan murid bukan sahaja berfungsi sebagai medium penyaluran ilmu, tetapi juga sebagai jalan pembentukan akhlak. Hal ini dapat dilihat jelas dalam sistem sanad al-Quran dan hadis dapat dipastikan melalui proses pertemuan langsung dengan guru yang berautoriti. Selain itu, suhbah berperanan sebagai alat tarbiyah Rohani, di mana murid bukan sahaja menerima pengetahuan, tetapi turut membina peribadi melalui bimbingan guru yang soleh.

Kepentingan Masyarakat Sejahtera

Kajian oleh Mubarak, Othman, Abd Majid dan Suhaila Nadzri (2022) mendapati bahawa kesejahteraan (*wee-being*) tidak hanya diukur melalui indicator ekonomi, tetapi turut merangkumi pemeliharaan agama, akal, jiwa, keturunan dan harta. Dimensi hubungan sosial yang menyokong antara anggota masyarakat turut ditekankan sebagai komponen penting bagi memastikan kesejahteraan yang holistic. Penemuan ini menegaskan bahawa hubungan sosial yang baik seperti persahabatan dengan teman yang baik berperanan sebagai mekanisme tarbiyah yang memelihara agama dan akal, seterusnya memperkukuhkan struktur sosial masyarakat.

Selain itu, kajian yang ditulis oleh Sari, Nasikhin dan Mustopa (2025) meneliti konsep ukhuwah Islamiyah dalam pembinaan masyarakat madani, khususnya dalam kalangan Generasi Z yang berdepan cabaran individualisme dan disinformasi digital. Kajian mereka menegaskan bahawa ukhuwah yang berteraskan ajaran al-Quran dan Sunnah mampu memupuk kesatuan, toleransi dan keadilan dalam masyarakat majmuk.

Metodologi Kajian

Pendekatan kualitatif digunakan sepenuhnya oleh pengkaji dalam menjelaskan peranan *as-suhbah as-solehah* dalam membentuk masyarakat Sejahtera. Oleh yang demikian, pengkaji menjalankan penyelidikan perpustakaan bagi membuat pengumpulan data dengan merujuk kitab-kitab yang bersumberkan al-Quran dan Hadis disamping rujukan dari kajian-kajian ilmiah yang lain. Sebagai contoh penulis mendapatkan data daripada sarjana-sarjana terdahulu melalui jurnal, artikel, serta laman-laman web yang berautoriti. Segala maklumat telah dikumpul untuk difahami kemudian dibuat kesimpulan. Melalui kajian ini penulis memperolehi maklumat berkaitan kepentingan berdamping dengan orang yang soleh, peranannya serta kesannya terhadap pembentukan masyarakat sejahtera. Hadith yang dipilih melalui kata kunci dan hadith-hadith yang masyhur disisi masyarakat Islam apabila disebut berkaitan persahabatan dan hubungan antara kawan.

Kepentingan Mendampingi Orang Soleh (*As-Suhbah Al-Solehah*)

Mendampingi orang soleh merupakan perihal penting bagi seorang muslim dalam kehidupan. Hal ini kerana, terdapat dalil al-Quran dan Hadith yang menyarankan supaya umat Islam untuk mendampingi orang soleh. Firman Allah di dalam ayat ke 28, surah al-kahfi:

"وَأَصْبِرْ نَفْسَكَ مَعَ الَّذِينَ يَدْعُونَ رَبَّهُمْ بِالْغَدَاةِ وَالْعَشِيِّ يُرِيدُونَ وَجْهَهُ وَلَا تَعْدُ عَيْنَاكَ عَنْهُمْ تُرِيدُ زِينَةَ الْحَيَاةِ الدُّنْيَا وَلَا تُطِعْ مَنْ أَغْفَلْنَا قَلْبَهُ عَن ذِكْرِنَا وَاتَّبَعَ هَوَاهُ وَكَانَ أَمْرُهُ فُرُطًا"

Maksudnya: "Dan bersabarlah engkau (Muhammad bersama orang yang menyeru Tuhannya pada waktu pagi dan senja dengan mengharap keredhaan-Nya dan janganlah kedua-dua matamu berpaling daripada mereka kerana mengharapkan perhiasan kehidupan dunia dan janganlah engkau mengikuti orang yang hatinya telah kami lalaikan daripada mengingat Kami, serta menuruti keinginannya dan keadaannya sudah melampaui batas." (Surah al-Kahfi, 28)

Ayat ini menunjukkan betapa pentingnya untuk kita berdamping dengan orang yang beriman dan soleh, kerana mereka akan memberi pengaruh yang baik terhadap kita. Allah menegaskan agar kita tidak berpaling dari mereka kerana ingin mengejar kesenangan duniawi yang akan membawa kita jauh dari jalan kebenaran. Nabi SAW juga telah memberi pesanan berdasarkan hadithnya yang diriwayatkan oleh Saidina Anas RA:

عَنْ أَنَسٍ رَضِيَ اللَّهُ عَنْهُ، أَنَّ رَجُلًا سَأَلَ النَّبِيَّ صَلَّى اللَّهُ عَلَيْهِ وَسَلَّمَ عَنِ السَّاعَةِ، فَقَالَ : مَتَى السَّاعَةُ ؟ قَالَ : " وَمَاذَا أَعَدَدْتَ لَهَا ؟ " قَالَ : لَا شَيْءَ، إِلَّا أَنِّي أُحِبُّ اللَّهَ وَرَسُولَهُ صَلَّى اللَّهُ عَلَيْهِ وَسَلَّمَ. فَقَالَ : أَنْتَ مَعَ مَنْ أَحْبَبْتَ "

Maksudnya "Bahawa seorang lelaki bertanya: Wahai Rasulullah, bilakah hari kiamat?" Rasulullah SWT bersabda, "Apa yang telah engkau persiapkan untuk menyambut kedatangannya?" Orang itu menjawab, "Untuk menyambutnya, saya tidak melakukan apa-apa persiapan akan tetapi saya mencintai Allah dan Rasul-Nya." Rasulullah SAW bersabda, "Engkau akan bersama dengan orang yang engkau cintai." (Sahih al-Bukhari)

Ibnu Hajar menyebutkan dalam Kitab Fath al-Bari bahawa lelaki yang bertanya soalan tersebut adalah Dzul Khuwaishirah. Beliau berasal dari pendalaman Yaman yang pernah kencing di masjid Nabi SAW. Hanya berbekalkan cinta yang tulus kepada Allah dan Rasul-Nya maka beliau telah mendapat satu jaminan yang mulia daripada Nabi SAW iaitu beliau akan bersama dengan Nabi SAW di akhirat kelak. Kesimpulannya, pengajaran yang dapat disimpulkan melalui sub topik ini adalah betapa pentingnya orang Islam untuk mendampingi (Suhbah) dengan orang alim yang soleh, teman yang jujur lagi berakhlak dan melazimi majlis-majlis yang mengingatkan kita kepada Allah. Kebanyakan Ulama' sangat menitik beratkan berkaitan suhbah terhadap anak-anak murid mereka supaya ilmu yang dipelajari bukan sekadar teori semata-mata, namun ilmu yang guru sampaikan itu dapat diserap dan diamalkan di dalam hati sanubari serta akhlak yang mulia. Ibnu Ajibah (1419) telah menyebut di dalam kitab tafsirnya satu ungkapan yang sangat menarik untuk direnungi iaitu:

"ما أفلح من أفلح إلا بصحبة من أفلح، فالنفس الحية لا تموت مع الأحياء، وإنما تموت مع الأموات، فهي كالحوت ما دامت في البحر مع الحيتان لا تموت أبداً، فإذا أخرجتها وعزلتها عن أبناء جنسها ماتت سريعاً"

Maksudnya: “Tidak berjaya orang yang telah berjaya kecuali mereka bersuhbah (berdamping) dengan orang yang telah berjaya, begitu juga dengan jiwa yang hidup, tidak akan mati bersama yang hidup, tetapi akan mati apabila bersama jiwa yang telah mati, ibarat ikan paus selama berada di laut bersama lingkungannya pasti ia tidak akan mati. Namun, Jika dikeluarkannya dan diasingkannya daripada jenisnya, pasti ikan paus itu akan mati dengan cepat.

Sifat-sifat persahabatan yang Baik

1. Bersifat Jujur Zahir dan Batin

Antara sifat sahabat yang baik ialah jujur dan benar seperti cermin yang memantulkan imej sebenar. Hal ini kerana, hubungan sesama mukmin menuntut wujudnya suatu mekanisme refleksi sosial, di mana setiap individu berfungsi sebagai pengingat dan penilai terhadap tindak-tanduk saudaranya. Sebagaimana cermin tidak menyembunyikan hakikat keadaan, demikian juga seorang mukmin seharusnya menzahirkan kebaikan yang ada serta membantu menyingkap kekurangan saudaranya dengan penuh keikhlasan. Hal ini bukan bertujuan memperlekehkan, sebaliknya berfungsi sebagai instrument *tarbiyah* (didikan) dan *islah* (pembaikan) dalam rangka membentuk keperibadian yang selari dengan tuntutan syariat. Hal ini seperti mana dijelaskan oleh hadis Nabi SAW yang diriwayatkan oleh Imam Abu Daud:

عَنْ أَبِي هُرَيْرَةَ، عَنْ رَسُولِ اللَّهِ صَلَّى اللَّهُ عَلَيْهِ وَسَلَّمَ قَالَ: "الْمُؤْمِنُ مِرْآةُ الْمُؤْمِنِ، وَالْمُؤْمِنُ أَخُو الْمُؤْمِنِ، يَكْفُ عَلَيْهِ ضِيعَتُهُ، وَيَحْوَطُهُ مِنْ وَرَائِهِ" (سنن أبي داود)

Maksudnya: Daripada Abu Hurairah RA, Rasulullah SAW bersabda: “Seorang mukmin merupakan cerminan bagi mukmin yang lain, dan seorang mukmin adalah saudara kepada mukmin yang lain. Seseorang mukmin itu akan membantu saudaranya ketika berada dalam kesempitan serta melindunginya daripada sebarang ancaman di belakangnya.” [Riwayat Abu Daud, No. 4918, status: hasan]

2. Beriman dan Bertakwa

Antara sifat yang penting juga bagi sahabat ialah menjaga hubungannya dengan Allah iaitu seorang yang beriman dan bertakwa kepada Allah. Di dalam hal ini Rasulullah SAW pernah bersabda melalui hadith yang diriwayatkan oleh Abi Said al-Khudri:

"لَا تُصَاحِبْ إِلَّا مُؤْمِنًا، وَلَا يَأْكُلْ طَعَامَكَ إِلَّا تَقِيًّا" (سنن الترمذي)

Maksudnya: “Jangan kamu mengambil sahabat kecuali orang yang beriman, dan jangan kamu makan makananmu kecuali orang yang bertakwa.” [Riwayat Tirmizi, No. 2395, status: hasan]

Hadis Abu Said Al-Khudri RA ini memberikan pengertian bahawa seorang muslim wajib melazimi dan mendampingi orang-orang yang soleh dalam kebanyakan keadaan hidupnya. Hadis ini mengandungi saranan berteman dengan orang-orang beriman. Ini menuntut supaya kita menjauhi pertemanan dengan orang-orang kafir dan munafik. Hal ini kerana, berteman dengan mereka itu membahayakan agama dan kehidupan akhirat. Seterusnya, hadis di atas turut menjelaskan bahawa orang yang bertakwa semestinya apabila mereka makan maka makanan tersebut diniatkan sebagai kekuatan untuk beribadah kepada Allah. Ini termasuk juga dalam majlis pernikahan atau jamuan makan, maka digalakkan menjemput orang-orang beriman dan

bertakwa hadir undangan tersebut untuk memastikan majlis makan dalam keadaan diredhai dan diberkati Allah. Sebahagian Ulama' pernah memberi wasiat (Hazim Khanfar, 1430H):

"إِصْحَبْ أَهْلَ التَّقْوَى؛ فَإِنَّهُمْ أَيْسَرُ أَهْلِ الدُّنْيَا عَلَيْكَ مَوْنَةً، وَكَثَرُهُمْ لَكَ مَعُونَةً"

Maksudnya: Bersahabatlah dengan orang bertakwa, maka sesungguhnya mereka adalah orang yang paling mudah membantumu di dunia dan paling banyak memberi bantuan kepadamu. Ibnu Masud RA juga di dalam kitab az-zuhd (1414H):

"لَا عَلَيْكَ أَنْ تَصْحَبَ إِلَّا مَنْ أَعَانَكَ عَلَى ذِكْرِ اللَّهِ"

Maksudnya: Janganlah engkau bersahabat kecuali dengan orang yang membantu mengingatkan engkau kepada Allah SWT.

Dengan ini jelaslah bahawa Nabi SAW menasihatikan untuk bersahabat dengan orang-orang yang beriman dan bertakwa. Melalui persahabatan ini akan melahirkan orang yang berakal dan berakhlak mulia. Sebaliknya persahabatan dengan orang yang tidak beriman dan tidak bertakwa akan mewariskan perkara-perkara yang tidak baik sepertimana di dalam kitab yang dikarang oleh Hazim Khanfar (1430):

"صحبة الأشرار تورث سوء الظن بالأخيار"

Maksudnya: Persahabatan dengan orang-orang yang tidak baik membawa kepada sangka buruk kepada orang-orang baik

3. Saling Membantu dan Mendoakan

Persahabatan yang baik tidak hanya terhad kepada keduniaan dan kebendaan semata-mata, namun persahabatan mereka berpanjangan sehingga ke syurga. Hati mereka selamat dengan keikhlasan yang tinggi dan mereka sanggup berkorban untuk sahabatnya, memberi pertolongan, doa untuk sahabat dan saling menghargai tanpa hasad dengki. Maka dapat dirumuskan bahawa sifat sahabat yang baik berasaskan *ta'āwun* (saling membantu) dan *taḥābun* (saling mendoakan), kerana kedua-duanya menjadi asas kepada pembinaan ukhuwwah islamiyyah yang kukuh. Hal ini dapat ditelusuri melalui hadis riwayat Ahmad (12709) dan Abū Dāwūd (4812) daripada Anas bin Mālik RA:

عَنْ أَنَسِ بْنِ مَالِكٍ رَضِيَ اللَّهُ عَنْهُ قَالَ: قَالَ الْمُهَاجِرُونَ: يَا رَسُولَ اللَّهِ مَا رَأَيْنَا مِثْلَ قَوْمٍ قَدِمْنَا عَلَيْهِمْ أَحْسَنَ بَدَلًا مِنْ كَثِيرٍ وَلَا أَحْسَنَ مُوَسَّاةً فِي قَلِيلٍ، قَدْ كَفَوْنَا الْمُؤْنَةَ وَأَشْرَكُونَا فِي الْمَهْنَةِ، فَقَدْ حَشِينَا أَنْ يَذْهَبُوا بِالْأَجْرِ كُلِّهِ. فَقَدْ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: كَلَّا؛ مَا أَتَيْنِيُمْ عَلَيْهِمْ بِهِ، وَدَعَوْتُمُ اللَّهَ عَزَّ وَجَلَّ لَهُمْ.

Maksudnya: Muhajirin berkata kepada Rasulullah SAW: “Yā Rasūlallāh, kami tidak pernah melihat suatu kaum seperti kaum (Ansar) yang kami datang kepada mereka. Mereka memberi dengan banyak, dan tetap berkongsi walaupun dalam keadaan sedikit, mereka meringankan beban kami dan berkongsi kenikmatan bersama kami, sehingga kami khuatir mereka akan memperoleh semua pahala.” Lalu Baginda ﷺ menjawab: “Tidak, bahkan selama kamu memuji mereka dan mendoakan mereka, maka kamu juga mendapat pahala.” (Ahmad (12709) & Abū Dāwūd (4812))

Hadith ini mengajarkan kita bahawa persahabatan mestilah dibina dengan dasar keikhlasan sehingga seseorang sahabat itu sanggup bекorban dan membantu sahabatnya semampu yang mungkin. Tanpa perasaan hasad dengki disaat sahabatnya berjaya dan sikap merendahkan sahabatnya disaat kegagalan. Persahabatan hanya mengenal erti perasaan berkorban untuk sahabat yang lain seolah-olah sahabatnya itu seperti dirinya sendiri.

Selain itu, hadith ini juga menegaskan bahawa sahabat yang baik bukan Sahaja membantu dengan harta dan tenaga, tetapi juga yang membalas dengan doa serta penghargaan. Sokongan kepada konsep ini dapat dilihat dalam sabda Nabi SAW yang lain daripada Abi Musa RA, bahawa Nabi SAW bersabda:

المؤمن للمؤمن كالبنيان، يشد بعضه بعضا وشبك بين أصابعه

Maksudnya: “Orang mukmin dengan mukmin yang lain itu bagaikan sebuah bangunan, saling menguatkan antara satu sama lain” (Riwayat al-Bukhari)

Justeru itu, hadith-hadith ini menggambarkan bahawa sifat sahabat yang baik ialah mereka yang saling memberi manfaat sama ada membantu secara zahir atau batin seperti mendoakan. Ini menjadikan sebuah persahabatan itu Ikhlas dan diredhai Allah.

4. Menegur Dan Menghalang Daripada Melakukan Kesilapan

Sahabat yang baik akan menghalang dan menegur kawannya dari melakukan kesilapan. Lihat bagaimana Rasulullah SAW menegur Muaz RA Ketika Muaz RA membaca surah yang Panjang saat menjadi imam. Seorang imam sepatutnya tidak membaca surah yang panjang dalam solat fardhu. Sekiranya kita perhatikan teguran Rasulullah SAW ini maka ini Adalah teguran perihal solat, bukannya maksiat. Sekiranya dalam melakukan kebaikan pun ditegur demi kebaikan, apatah lagi kalua Kawan melakukan kesilapan atau kesalahan, pastilah perlu ditegur. Antara kisah lain adalah kisah Muaz bin Jabal yang menegur Umar yang terkhilaf dalam meletakkan hukuman ke atas anak zina. Muaz menegur hukuman keras yang dikenakan oleh Umar tersebut. Umar sedar terkhilaf lalu berkata:

لولا معاذ لهلك عمر

Maksudnya: “Kalaupun tidak kerana (teguran) Muaz, binasalah Umar.” (Siyar A’lam al-Nubala)

Peranan *As-Suhbah Al-Solehah* Dalam Membentuk Masyarakat Sejahtera

1. Mendidik Masyarakat Berakhlak Mulia

Hadith yang menceritakan berkaitan peranan as-suhbah as-solehah penting untuk pembentukan akhlak seperti hadith yang diriwayatkan oleh Abi Musa RA bahawa Rasulullah SAW bersabda:

مَثَلُ الْجَلِيسِ الصَّالِحِ وَالسَّوِّءِ، كَحَامِلِ الْمِسْكِ وَنَافِخِ الْكَيْسِ، فَإِذَا أُنْجِذِيكَ، وَإِذَا أُنْ تَبَنَعَ مِنْهُ، وَإِذَا أُنْ تَجَدَ مِنْهُ رِيحًا طَيِّبَةً، وَنَافِخِ الْكَيْسِ: إِذَا أُنْ يُحْرِقَ ثِيَابَكَ، وَإِذَا أُنْ تَجَدَ رِيحًا خَبِيثَةً

Maksudnya: “Perumpamaan teman yang baik dan teman yang buruk adalah seperti seorang penjual minyak wangi dan seorang tukang besi. Adapun, penjual minyak wangi akan memberi

kamu (minyak wangi tersebut), atau kamu membeli daripadanya, atau kamu mendapat bau yang harum daripadanya. Sedangkan tukang besi pula, akan membakar bajumu dan juga kamu mendapatkan bau yang busuk.”

Menurut Ibnu Hajar Al-Asqolani bahawa hadis ini menggalakkan manusia untuk sentiasa melazimi majlis-majlis yang mendatangkan manfaat kepada agama dan dunia seseorang itu. Majlis-majlis yang memberi manfaat seperti ini adalah majlis yang menjaga maruah diri, majlis Bersama orang-orang soleh dan majlis dengan orang yang baik. Melazimi dan sentiasa berdamping dengan orang-orang sebegini mempunyai manfaat yang cukup besar di akhirat dan dunia seseorang sehingga Nabi SAW telah berpesan kepada umat baginda berkenaan begitu pentingnya melazimi orang-orang yang soleh ini. Tambahan pula, Hadis ini juga telah melarang manusia daripada melazimi majlis bersama orang-orang yang kurang baik yang akan memberi kesan buruk pada agama dan dunia seseorang. Ibnu Hibban ketika menyebut hadis ini menyatakan bahawa perumpamaan teman yang baik seperti penjual minyak wangi ini menjadi bukti bahawa minyak wangi itu suci dan harus digunakan sepertimana mafhum hadith dari kitab Sunan Abi-Daud yang diriwayatkan oleh Said al-Khudri ia berkata, Rasulullah SAW bersabda, ‘Sebaik-baik minyak wangi yang kalian miliki adalah kasturi’.

Qadhi Iyadh meletakkan hadith ini di bawah bab yang bertajuk sunat berdamping dengan orang soleh dan menjauhi orang-orang yang tidak baik. Perumpamaan yang disebutkan di dalam hadith di atas menunjukkan bahawa Rasulullah SAW melarang umatnya untuk bergaul Bersama teman yang jahat, sesat akidahnya, mengumpat dan mencaci orang lain. Hal ini kerana, semua keburukan mereka akan memberi kesan kepada orang yang berdamping dengan mereka. Oleh itu, manusia yang beriman kepada Allah dan Rasul-Nya mestilah berdamping dengan teman yang baik, yang dapat mengambil ilmu dan adab dari temannya itu serta mempunyai akhlak yang mulia.

2. Menguatkan Iman Dan Menjauhi Penyakit Mental

Berdamping dengan golongan yang soleh sudah semestinya akan memberi natijah yang baik kepada kita. Imam Hasan al-Basri pernah menyebut bahawa: “Perbanyakkanlah bersahabat dengan orang-orang yang beriman kerana sesungguhnya mereka itu akan membantu memberi syafaat di akhirat kelak.” Kalam Imam Hasan al-Basri ini sangat penting kepada seluruh manusia untuk mengambil berat soal persahabatan di dunia kerana ia akan berlanjutan sehingga ke hari akhirat kelak. Antara hadith yang merungkai kesan persahabatan yang baik ini adalah hadith yang diriwayatkan oleh Hanzhalah bin Rabi’ Al-Usaidi RA:

قَالَ لَقِينِي أَبُو بَكْرٍ، فَقَالَ: كَيْفَ أَنْتَ؟ يَا حَنْظَلَةُ قَالَ: قُلْتُ: نَافَقٌ حَنْظَلَةُ، قَالَ: سُبْحَانَ اللَّهِ مَا تَقُولُ؟ قَالَ: قُلْتُ: نَكُونُ عِنْدَ رَسُولِ اللَّهِ صَلَّى اللَّهُ عَلَيْهِ وَسَلَّمَ، يُدَكِّرُنَا بِالنَّارِ وَالْجَنَّةِ، حَتَّى كَأَنَّا رَأَيْ عَيْنٍ، فَإِذَا خَرَجْنَا مِنْ عِنْدِ رَسُولِ اللَّهِ صَلَّى اللَّهُ عَلَيْهِ وَسَلَّمَ، عَافَسْنَا الْأَزْوَاجَ وَالْأَوْلَادَ وَالضَّيِّعَاتِ، فَنَسِينَا كَثِيرًا، قَالَ أَبُو بَكْرٍ: فَوَاللَّهِ إِنَّا لَنَلْقَى مِثْلَ هَذَا، فَأَنْطَلَقْتُ أَنَا وَأَبُو بَكْرٍ، حَتَّى دَخَلْنَا عَلَى رَسُولِ اللَّهِ صَلَّى اللَّهُ عَلَيْهِ وَسَلَّمَ، قُلْتُ: نَافَقٌ حَنْظَلَةُ، يَا رَسُولَ اللَّهِ فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ «وَمَا ذَاكَ؟» قُلْتُ: يَا رَسُولَ اللَّهِ نَكُونُ عِنْدَكَ، تُدَكِّرُنَا بِالنَّارِ وَالْجَنَّةِ، حَتَّى كَأَنَّا رَأَيْ عَيْنٍ، فَإِذَا خَرَجْنَا مِنْ عِنْدِكَ، عَافَسْنَا الْأَزْوَاجَ وَالْأَوْلَادَ وَالضَّيِّعَاتِ، نَسِينَا كَثِيرًا فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: «وَالَّذِي نَفْسِي بِيَدِهِ إِنْ لَوْ تَدُومُونَ عَلَى مَا تَكُونُونَ عِنْدِي، وَفِي الذِّكْرِ، لَصَافَحْتُكُمْ الْمَلَائِكَةُ عَلَى فُرْشِكُمْ وَفِي طُرُقِكُمْ، وَلَكِنْ يَا حَنْظَلَةُ سَاعَةً وَسَاعَةً» ثَلَاثَ مَرَّاتٍ.

Maksudnya: “Hanzalah bin Rabi’ Al-Usaidi RA berkata: Aku bertemu Abu Bakar, lalu beliau bertanya, bagaimana khabar kamu wahai Hanzalah? Saya menjawab: Hanzalah telah menjadi munafik. Abu Bakar berkata: Subhanallah apa yang kamu katakana? Saya menjawab: Pada saat kami ada di sisi Rasulullah, kami diingatkan syurga dan neraka, sehingga seperti di depan mata. Tetapi ketika kami sudah keluar dari sisi Rasulullah, kami diperdaya oleh isteri, anak dan hal-hal yang tidak penting sehingga kami banyak lupa. Abu Bakar berkata: Demi Allah aku juga mengalami perkara yang sama. Maka keduanya bergegas menemui Rasulullah di rumahnya. Hanzalah berkata: Ya Rasulullah, saya telah menjadi munafik. Rasulullah SAW bertanya: Kenapa boleh jadi begitu? Hanzalah menjawab: Pada saat kami ada di sisi engkau, kami diingatkan syurga dan neraka, seakan-akan seperti di depan mata. Tetapi ketika kami sudah keluar dari sisi Rasulullah SAW kami diperdaya oleh isteri, anak dan hal-hal yang tidak penting, sehingga kami banyak lupa. Rasulullah SAW menjawab: Demi zat yang jiwaku ada ditanganNya, seandainya kamu terus bersamaku dan terus berzikir, pasti malaikat akan selalu bersamamu di tempat tidur kamu dan setiap perjalanan kamu tetapi kamu Hanzalah sesaat demi sesaat, sesaat demi sesaat, sesaat demi sesaat.”

Di dalam hadith ini menceritakan bahawa Saiyyidina Hanzalah al-Usaidi pernah menceritakan keseimbangan beliau tentang hatinya yang tidak konsisiten. Perkara ini pada mulanya diadukan kepada Abu Bakar. Kata Hanzalah: “Ketika aku mendengar tazkirah dari Rasulullah, aku menangis. Namun apabila aku pulang ke rumah bersama ahli keluargaku, aku bergelak ketawa. Bagaimana keadaan hatiku ini?” Hanzalah dan Abu Bakar lantas berjumpa dengan Rasulullah lalu bertanya tentang persoalan hati ini. Ketika mendengar tazkirah, mereka menangis. Namun ketika bersama ahli keluarga mereka bergembira. Keadaan sahabat Nabi SAW ini menunjukkan bahawa pergaulan atau perdampingan dengan orang soleh mampu meningkatkan iman, manakala menjauhkan dari daripada orang soleh akan memberikan kesan kepada iman kita.

Hadith ini juga membawa contoh bahawa perdampingan dengan orang-orang soleh akan menyebabkan jiwa dan hati manusia menjadi tenang. Perasaan was-was merupakan antara penyakit kesihatan mental yang menimpa sebahagian manusia maka dengan duduk berdamping dengan orang-orang alim dan soleh akan menyebabkan keyakinan mereka kembali teguh sekaligus menghilangkan sangkaan dan ragu-ragu yang membelengui pemikiran dan jiwa mereka. Oleh itu, masyarakat akan hidup dalam keadaan tenang dan memahami tujuan hidup mereka di dunia ini adalah untuk akhirat dan tidak terbeban dengan keduniaan sehingga ingin melakukan perkara-perkara yang tidak baik seperti membunuh diri.

3. Menyebarkan Kasih Sayang Dalam Masyarakat

Perdampinagn dengan orang soleh juga mampu menjadikan masyarakat lebih harmoni dan kasih mengasihi antara satu sama lain. Hal ini berdasarkan hadith Nabi SAW bersabda:

عَنْ أَنَسِ بْنِ مَالِكٍ رَضِيَ اللَّهُ عَنْهُ قَالَ: قَالَ الْمُهَاجِرُونَ: يَا رَسُولَ اللَّهِ مَا رَأَيْنَا مِثْلَ قَوْمٍ قَدِمْنَا عَلَيْهِمْ أَحْسَنَ بَدَلًا مِنْ كَثِيرٍ وَلَا أَحْسَنَ مُوَاسَاةً فِي قَلِيلٍ، قَدْ كَفَوْنَا الْمُتُونَةَ وَأَشْرَكُونَا فِي الْمَهْنَةِ، فَقَدْ حَشِينَا أَنْ يَذْهَبُوا بِالْأَجْرِ كُلِّهِ. فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: كَلَّا؛ مَا أَتَيْنْتُمْ عَلَيْهِمْ بِهِ، وَدَعَوْتُمْ اللَّهَ عَزَّ وَجَلَّ لَهُمْ.

Maksudnya: Muhajirin berkata kepada Rasulullah SAW: “Yā Rasūlallāh, kami tidak pernah melihat suatu kaum seperti kaum (Ansar) yang kami datang kepada mereka. Mereka memberi dengan banyak, dan tetap berkongsi walaupun dalam keadaan sedikit, mereka meringankan

beban kami dan berkongsi kenikmatan bersama kami, sehingga kami khawatir mereka akan memperoleh semua pahala.” Lalu Baginda ﷺ menjawab: “Tidak, bahkan selama kamu memuji mereka dan mendoakan mereka, maka kamu juga mendapat pahala.” (Ahmad (12709) & Abū Dāwūd (4812))

Di samping itu, terdapat Riwayat daripada Abu Hurairah bahawa Nabi SAW bersabda:

الرجل على دين خليله، فلينظر أحدكم من يخالل

Maksudnya: “Seseorang itu berdasarkan agama temannya, maka perhatikanlah seseorang diantara kamu dengan siapa kamu berteman” (Sunan Tirmizi)

Syeikh Azim Abadi (1415H) menjelaskan bahawa seseorang manusia itu akan mengikuti tabiat, cara dan tatasusila rakan-rakannya. Maka dinasihati kepada seluruh umat manusia untuk berfikir sejenak dan bermuhasabah dalam memilih kumpulan pergaulan kerana walaupun seseorang individu itu seorang yang soleh, dia pasti akan mencuri satu sifat yang buruk dari rakannya. Apatah lagi jika rakan-rakannya orang-orang yang jahat.

Kesimpulan

As-suhbah as-solehah memainkan peranan yang amat penting dalam membentuk masyarakat yang sejahtera, harmoni dan berakhlak mulia serta menjauhi segalam isu-isu Kesihatan mental yang semakin membarah dalam kalangan masyarakat. Pergaulan dengan sahabat yang beriman dan bertakwa bukan sahaja dapat memperkukuh keimanan individu, malah turut memberi impak positif terhadap pembangunan rohani dan sosial masyarakat. Oleh itu, umat Islam haruslah bijak memilih rakan yang boleh membimbing ke arah kebaikan agar terbentuk sebuah komuniti yang diredai Allah serta mampu menghadapi cabaran kehidupan berlandaskan ajaran Islam. Sebagai manusia yang memerlukan hubungan komunikasi bersama manusia maka perbanyakkan diri untuk bergaul bersama-sama orang yang soleh. Pergaulan dengan mereka akan memberi kesan yang baik terhadap jiwa dan akhlak manusia.

Rujukan

- Abdullah, A. Y. (2017). Adab Unggul Islam Dalam Persahabatan Antara Islam. *Malaysian Online Journal Of Education*, 1(2), 102-112.
- Abu Daud, S. A.-S. (1414H). *Az-Zuhd*. Mesir: Darul Misykat.
- Abu Daud, S. b.-A. (1430H). *Kitab Sunan Abi Daud , Tahqiq Syu'aib al-Arnaut*. Beirut: Darul al-Risalah al-Alamiah.
- Adam, D. A. (2022). Significance and Challenges of Special Companionship (As-Suhbah Al-Khasah). *KWASU International Journal of Education*.
- Al-Bukhari, Muhammad Bin Ismail. (1311H). *Sahih al-Bukhari*. Mesir: Al-Sultaniyyah.
- Al-Khattib, A. S. (1351H). *Ma'alim al-Sunan*. Halb: Matba'ah al-Ilmiah.
- Al-Mubarakfuri, A. a.-'. (n.d.). *Tuhfa al-Ahwazi*. Beirut: Dar Kutub al-Ilmiah.
- Al-Thabari, M. b.-T. (7780H). *Jami' al-Bayan Fi Ta'wil al-Quran*. Makkah: Dar Tarbiah Wa Turath.
- An-Nawawi, A. Z. (1392). *Al-Minhaj Syarah Sahih Muslim*. Beirut: Darul Ihya' at-Turath al-Arabiyy.
- As-Sakhawi, A. a.-K.-D. (2003). *Kitab Fathul Mughis Syarah AlFiyatul Hadis*. Mesir: Maktabah Sunnah.
- At-Tirmizi, M. b. (1395H). *Kitab Sunan Tirmizi. Tahqiq: Ahmad Muhd Shakir*. Mesir: Maktabah Wa Matba'ah Mustafa al-Babi al-Halabi.
- Azim Abadi, M. A. (1415H). *Aunul Ma'bud Syarah Sunan Abi Daud*. Beirut: Dar al-Kutub al-Ilmiah.
- Darihan Mubarak, Norfaizah Othman, Mariani Abd Majid & Suhaila Nadzri. (2022). Maqasid Shariah And Well-Being: A Systematic Literature Review. *International Conference on Islamic Economics*.
- Hajjaj, M. b. (1374H). *Sahih Muslim*. Beirut: Dar Ihya' at-Turath al-Arabi.
- Ibnu Ajibah, A. b. (1419). *Al-Bahr al-Madid Fi Tafsir al-Quran al-Majid. tahqiq: Ahmad Abdullah al-Qurasyi Ruslan. Dr Hassan Abbas Zaki*. Kaherah.
- Ibnu 'Asyur, M. T.-T.-A. (1984H). *Tafsir al-Tahrir Wa al-Tanwir*. Tunisia: Dar Tunisia Lin Nasyr.
- Ibnu Hajar Al-Asqolani, A. b. (1379). *Fathul Bari Sharah Sahih al-Bukhari*. Beirut: Dar Ma'rifah.
- Ibnu Manzur, M. b. (1414H). *Lisan al-Arab*. Beirut: Dar al-Sadr.
- Khanfar, H. (1430H). *Kitab Ghayat al-Manut Fi Adab As-Sohbah Wa al-Ukhwah*. Darul al-Sodeq.
- Kurnianingsih, D. J. (2023). *Etika Persahabatan Perspektif Ibn Miskawayh*. Jakarta: UIN Syarif Hidayatullah Jakarta.
- Latif, M. N. (2024). The Role of Sacred Personalities In Social Cohesion: A Research and Analytical Review In The Light of Islamic Teachings. *Scholar Insight Journal*, Vol. 2, No. 2.
- Pahlevi, P. U. (2022). Peranan Teman Sebaya Sebagai Moderator Pembentukan Karakter Anak: Systematic Literature Review. *INSPIRATIF: Journal of Educational Psychology*, Volume 1, Nombor 1.
- Qadhi Iyadh, I. b. (1419H). *Ikmal al-Muallim bi Fawaid Muslim*. Mesir: Dar Wafa'.
- Saharanpuri, S. K. (1427H). *Badhl Al-Majhud Fi Hall Abi Dawud*. Hind: Markaz Syeikh Abi Hasan an-Nadwi Li Buhus Wa Dirasat al-Islamiyah.
- Shamsiah Mohamad, Asmak Ab Rahman & Sharifah Hayaati Syed Ismail. (2010). Kesejahteraan Ummah Dan Agihan Semula. *Seminar Serantau Islam dan Kesejahteraan Sejagat Universiti Islam Sultan Sharif Ali Brunei Darussalam*.
- Verina Arti Kurnia Sari, N. &. (2025). The Concept of Ukhuwah Islamiyah in Building Civil

Society For Generation Z. *Journal Sosial and Humaniora*, 65-69.
Zuhaili, P. D. (1991). *Tafsir Al-Munir*. Syria: Dar Fikr.